



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir\_yimyim



tir yimyim

TAPAK 8



Iran Tir-i Foreign Minister Araghchi  
mapa nungi anentsüner



Taoba England defender Young  
asaya nungi anisungzüker

VOL. XXIII ISSUE NO. 198 (ADOK 198) DIMAPUR KÜPTOKNÜ (SATURDAY) MONUPII (MAY) 02, 2026 ₹ 5.00

## Jana anepalutsü asoshi senden amen

**Dimapur, May 1, 2026 (TYO):** May 1, 2026 nü Nagaland Chief Secretary Sentyanger Imchen, IAS-i Solid Waste Management Rules, 2026 mapa tenzüksü dak sendakba asoshi senden ka ayonga menogo.

Supreme Court-i tetuyuba agütsüba nung ajemdaker pai Conference Hall, Civil Secretariat, Kohima nung iba senden ayonga amen.

"Ministry of Environment, Forest and Climate Change ajanga January 27, 2026 nung SWM Rules, 2026 sangdongogo aser iba ya April 1, 2026 nungi mapa tenzükogo. Asenoki sustainable solid waste management maparen inyaksüla aser Rules sülen anidaksüla, anungji department ajaki iba mapa inyaksü tuyur" ta Chief Secretary, Sentyanger-i ashi.

Iba dak sendakba nung

district administrations, Urban Local Bodies (ULBs), aser Rural Local Bodies (RLBs) o nübortem den amalitepa asalentongtem yanglutsüla aser mapang züngzüka yur inyaksüla ta Chief Secretary-isa ashi.

Supreme Court-i ashiba sülen manidakra state sorkari tetsükdaksü ajurutsü aser iba dak alia okadaki tuyuba nung bangdakpurtem aser ketdangsürtemi langzüksüsa akümtsü. Anungji department ajaki tebilemtsü khuret bena iba mapa inyaksü ayongzüker ta Sentyanger-isa metetdaksü.

Senden nung Principal Secretary, EF&CC, Y. Kikheto Sema, IAS-ia public awareness alitsü, jana bendangtsü, department balala tsüngda tesentaktep alitsü aser mapang shitak nung Court Order sülen anidaksü metetdaksü.

## District 3 nung ak wara puteta lir

**Dimapur, May 1, 2026 (TYO):** April 27, 2026 nü Dimapur nung sorkar veterinary doctor anati swine fever mesükba osangtem indang tebilemtsü lemsatepba sülen Peren, Longleng, aser Mokochung nung African Swine Fever (ASF) putetba osang metetdaksüogo.

Animal Husbandry and Veterinary Services nung Deputy Chief Veterinary Officer Dr. Ilang Zeliang-i Hokolbarnü iba osang metetdaksüogo.

Department-i tang tashi nung ak kwi dak iba shirang aliba mesüra asüba osang mengutet lir. Tang atemabo akshi achiba nung lendong kecha mali saka ASF wara puteta aliba tesemtem nung

shiruru bener senzüksü memelar ta Dr. Ilang-i ashi.

Peren district administration-ia Gaili village nung ASF wara putetba sülen Gaili, Punglwa, Ngwalwa, aser Jalukie Valley nungi ak tepsetba, ak bener aruba aser belenba ajak noktanga metetdaksüogo.

Iba tetuyuba sülen manidakertem dak ozüng tapet agi merenshitsü ta Peren district administration-isa ashi.

Tang tashi nungbo Dimapur nung ASF wara putetba osang kecha mali saka veterinary doctor temi ak metsürtem dang shirang ajitetba tashi balaka ayutsü aser ak mashimashii malitsü metetdaksüogo.

## Dmr aser Mkg nung NEPEX agiogo

**Dimapur, May 1, 2026 (TYO):** Dimapur aser Mokochung nung "Operation Night Guard/Air Raid" takok ngua agiogo. Iba ya 8 buba Nagaland Emergency Preparedness Exercise (NEPEX) 2026 nung shilem ka liasü.

April 30, 2026 nü Dimapur Deputy Commissioner indang Office nung structural damage aser fire incidents indang mock scenario ka liasü. Iba mapang nisung 2 asüba, 3 terara aser 4 kanga mejungi yiruba jilu ai.

Külen, East Dimapur Town Council (EDTC) nung drill alidang structural damage ka nung nisung 2 terara yiruba, 4 kanga mejungi yiruba aser 1 asüba indang ai.

Maneni, iba exercise nunga air raid siren liasü aser iba ya night guard mapang emergency warning systems jilu benshiba liasü.

Mokokchung nunga "Operation Night Guard- Civil Defence Air Raid/Blackout Exercise" takok ngua agiogo.

April 30, 2026 nikongdang 6:30 ako nungi iba exercise tenzükka liasü. Iba mapang RCDC Air Force 10 Wing aser SEOC Kohima nungi air raid indang osang ka angazükba jilu ai.

Iba osang angashili District Emergency Operations Centre (DEOC)-i Fire & Emergency Services ajanga sirens asadaksü aser Power Department-i 15-minute temporary blackout liasü.

Iba mapang Mokochung Deputy Commissioner Ajit Kumar Verma, IAS-i command staff jatep aser iba nung SP, ADC, SDO (C) Hq, EAC (DDMA Cell), DPRO, OC Wireless, aser DPA to the DEOC nung aden.

Iba exercise agiba sülen debriefing session ka agia liasü aser idangji Sr. SP Vesupra Kezo-i technical execution nung ajitetbatem lemsatep aser DC Ajit Kumar Verma-i ibala drills ajanga nübortem kümüzka ayutsüsam mapa inyaktetba indang ashi.

## Ao lima election mapang nisung tepsettepba yabo anentsüla: Y. Patton



Tongti tesemdanger Nagaland Dy. Chief Minister, Y. Patton, Chuchuyimlang-i Moatsü benjong amungi arudang tangokba noksa nung angur. (Chuchuyimlang, May 1, 2026).

**Chuchuyimlang, May 01, 2026**

**(TYO):** 1st May, 2026 nü Chuchuyimlang yimyak Moatsü sentong tulu ka ayonga benjongtepogo. Iba sentong nung Chuchuyimlang senso nüburtem den ano temeket Aor yim aser akhi mapang nungi Ancha benshia arur - Tuensang, Mon aser Longleng district-tem nungi kishikina yimtsüngtem jaoka kanga longso munga liasü.

Iba sentong nung Medemsanger, Pongching Cultural Troupe (Phom kin

nungi), Yaongyimsen Watsü Telen, Aoli Dobashi, Unger Cultural Troupe, Chakpa (Chang meden), Chuchuyimlang Senso Union Chuchuyimlang Town aser ano kija aser teloki akhi tsürabur yimya nung sobaliba kenten, yartsüngsang aser arr atsütepbatem ia sayuba ajanga benjongi arurtem kanga longsodaksü.

Iba sentong nung tongti tesemdanger Nagaland Dy. Chief Minister, Yanthungo Patton-i jembidang, Ao kinji kechisarena

ajak nung mezümpur lir, saka ano election mapang raratepba aser nisung tepsettepba nunga tamapur lir, anungji, iba Moatsü amungba tenüng nung asen tashimaittem meyipa repranger Ao lima election yimjung nung agitsü asoshi "clean election" nung temulung agütsütsü ayongzüker. Mezümpur tamang yimsüjia Aori dang bener aru, anungji, Arogo aser Tsüngrem tenzükertemi anir clean election atema inyakdaksünür ta paisa shisem.

(Maneni tapak 8 nung...)

## Waromung yimtak Moatsü kanga meraketa among



Waromung yimtak Moatsü benjong sentong nung Alakteta jaoker Hon'ble Advisor Agriculture Wb. Mathung Yanthan aser Sentong Meraketsür Hon'ble Advisor Fisheries & Aquatic Resources Wb. Pangjung Jamir tenati jembidang tangokba noksa angur.

**Mokokchung, Monupii/May 01 (TYO):** Waromung yimtak tanü Moatsü sentong kanga dang meraketa takok ngua Hon'ble Advisor Agriculture Wb. Mathung Yanthan Alakteta jaoker ama aser ano Hon'ble Advisor Fisheries & Aquatic Resources Wb. Pangjung Jamir Sentong Meraketsür ta tena akhüm agia mongogo.

Sentong Meraketsür Hon'ble Advisor Fisheries & Aquatic Resources Wb. Pangjung Jamir-i jembidang pei sobaliba wazüka ayutsü tangatetba nung Waromung Yimden-i Moatsü bejongmong ayongzüka akaba ya kanga junger, iba ama benjongmong akadang asenoki asen sobaliba pur medemsor

nungi angazükka temoatsü agitsüla ta ashi.

Asenok sobalibaji tapu aika dang lir, item rongnung sobusolemtsü aser osettsüset tapu balala-tem lir, ano kenten menü, yar tsüngsang, amongtsümong, jayajako, kisü jensü, awashi, akhümtsübutep aser ano aika lir, item ya mebenshira asen sobaliba mabensar, anungji asenoki item ya maneni benshiba ajanga asen sobaliba tajung wazüka yudi ta paisa ashi.

Tanu putu kanga dang kara ainba mapang ka nung lanurtemi pei yimtsüng aser pei kin kidong otsü meteta alitsü kanga dang tongtipang, anungjin lanurtemi pei tesü tebou aser tsürabur nungi aji

angazükka ayutsüla, aji memetetra sobaliba memetet ta züngshitsü ta Pangjung Jamir-isa ashi.

Advisor Pangjung Jamir-isa nübur ajaki pei tetsü oshi wazüka ayutsü asoshi kanga dang nungtaker, kechiaser tetsü oshi nisung ka aser kin ka asoshi tamaitü lir. Tanü putu kibong aika nung tsürabur-I anir kibong nung English aser Nagamese jembir, ya angudang kanga dang temelung shiranga bilemer, anungji kidang kibong nung pei tetsü oshi agi jembitsüla aser ibaji inyaktetba ajanga sobaliba wazüka ayuba nung tongtipsng shilem ka agir asütsü ta adenshia alir Mottsü benjongmong ayongzüka jembir.

(Maneni tapak 8 nung...)

# Mokokchung district kübok tesem balala nung Moatsü amung



NPF Mokokchung Division pur Moatsü benjong amungdang Minister Metsübo Jamir aser sentong nung shilem agirtem külemi tangokba noksa.

**Mokokchung, Monupii/May 01 (TYO):** Naga People's Front (NPF) Mokokchung Division pur Moatsü Benjongmung sentong tanü NPF Mokokchung Division Office kilem nung kangadang meraketketa longsolongsoa mongogo.

Election mapang nung Political Party telok kati timba kokteta takok ngutetbaji temoatsü ulura, ano iba den külemi NDPP aser NPF

lokteper NPF akümba ajanga Nagaland nung Regional Party NPF tashi kanga ita kümogo aser ibaji temoatsü ulura aser iba temoatsü nung asenok tanü temoatsü agia Moatsü benjong amonger ta iba sentong nung alakteta jaoker Minister Incharge Mkg. District Wb. Metsübo Jamir-i jembidang ashi.

Minister Metsübo-isa nisung ana longjemer benjong amongtsüa kanga dang tasak

saka tanü iba Moatsü yabo telok ana longjemer ampongba ya temoatsü ulura, anungji iba temoatsü ya meraksatsüsa mapatong ajanga nung teka amtepa longjemer inyaksüla, talisa NPF party tashi ita aotsü asoshi pei aliba tesem aser pei yimtsüing aser pei Unit nung kanga dang meranga inyakang ta tesentepertem ajungshia liasü.

Aor Kanga denag shisa ka-census maparen ya inyaksüla,

kechiaser census shitak meinyaktetra tang aliba MLA menden ter nungi menden ana mesüra asembo oadaktsü, anungji menden terjibosa alitsüla ta asüba tangatetba nung inyaksüla aser yangji NPF party pur-ia temelung agüja yaria inyaksü kanga dang tongtipang ta Minister Metsübo Jamir-ia ayongzüka jembidi. Sentong nung Tsüingrem lenisüba jazüka Farmers Wing NPF Mkg. Div Secretary Wt. Sentikala ajanga sarasademer tenzüka den NPF Mkg. Div. President Wb. Repameren Yaden ajanga tarur pela agizüka jembia liasü. Moatsü benjongmong Ratet Guru Limayanger Jamir Tatar Ungma ajanga kanga dang ratet rateta lemsatep aser Moatsü

Mongpu ken NPF Mkg. Division Parent Body Wb. Marchizüing aser Wb. Imtitemüsü lenisüba nung aten. Maotsü Salem o Wb. N. Bendang Jamir PDA Member, Sr. VP COB, Wb. Lanukaba, VP COB aser Wb. Meyitiba Lkr, President, 21 Tuli AC parnoki jembidi aser iba den ano Wt, Margaret aser Wt. Katitola lenisüba nung temeja ken ka aten aser Kr. Tiajungla T. Jamir-ia ken tajung ka tena liasü aser Wb. Nathan Ozüküm Gen. Secretary (Admin) Mkg. Div. ajanga melepzüing o jembidi aser Youth Wing NPF Mkg. Div. Working President Wb. Takonungsang ketdangsüba nung sentong agia telok külemi sarasadema sentong tembanga liasü.

## Longpayimsen nung Moatsü cum Mini Hornbill benjong tenzüko



**Dimapur, Monupii/May 01 (TYO):** Longpayimsen yimdak anogo ana Moatsü cum Mini Hornbill benjongmung May 1, 2026 nü tenzüka sentong Minister, Higher Education and Tourism, Temjen Imna Along-i moaja liasü.

Iba sentong nung jembidang, Moatsü ya alu nung tsüksüing-ensünga arutsü asoshi temoatsü meshiba benjong ka lir, aser nüburtemi asen lima nung tesunep aser yimchijimjung atema bushitsüla,

ta Minister Along-i ashi. Tanü putu nung meranga inyakba yimya samaa aor, anungji asenoki pei tera bushia maneni asen sobaliba aser yimya nungi tashi agizüktsüla, ta Minister-i ashi.

Longpayimsen nüburtemi Moatsü benjong ayongzüka asoshi pelaba lemsatepdang, Minister Imna Along-i Tsürangkong tsükong nung aliba nübur ajunga asoshi ibai mera tasen tenzüker asütsüla, ta ashi.

## Waromung nung 2029 AKM centenary atema renemshir



Waromung yimdak 2029 kum AKM centenary amungtsü aliba nungtem centennial yim ka yanglutsü atema Minister Metsübo Jamir-i April 30, 2029 nü longzüng ka azungtsüba mapang tangokba noksa nung angur.

**Mokokchung, Monupii/May 1 (TYO):** Tsürabur Nokdenlemba ya mangdang tulu abenba lenir ka liasü. Pa dak Ao kin aser Naga nung rangben bilemba shisa tajung alibaji pa mapa ajanga ajiteter, asenok pa nungi tangazüktsü aika lir, ta Nagaland RD & SIRD Minister, Metsübo Jamir-i Ao Kaketshir Mungdang Centenary koba 2029 kum Waromung nung amungtsü lir, iba dak rangloker renemshiba sentong ka 30th April, 2026 nü Waromung yimdak akadang pai mezüing AKM tir tenüing sanga metetdaksü.

Paisa Aor lenir kar tenüing tetshia jembidang, tsürabur Nokdenlemba den ano tesayur Mayangnokcha ama, mezüing Nagaland Chief Minister P. Shilu ama aser Dr. S.C Jamir parnoki Ao kin tammang tia nung alidang, par shisa rajem tulu aliyong Ao kin tenük lapoktsü, ta parnok nem aküm tetushi

agüja liasü. Parnok dak shisa tesatem aliba ama tanüa asenoki pei atema masü saka tangar tama südaktsüdi, ta paisa ayongzüker.

Tanü Ao kin reprangdangra, mezüing tenzükdangbo telungjem dak rangloker tenzüker, saka tanüba iba nükmengi samatoker amai ajiteter. Kaketshisashiba tsütsübo talang/tulu zünger saka asenok telungjem mali, anungji, AKM mezüingpuri kechi nükjidong yur tenzüker, iba nükmengi asenoki mamatoktsüla, ta pai shisem.

Tanü asen kin tangari mezüingpur ta züngshiba ya asenok ajungba yong masü, saka asen tsüraburtemi tamaren mapa inyakba ajanga lir. Mezüingpuri mangdang tulu yur tenzüker joko kum 100 yakta ajungtsü, Tsüingremi Aor nem maongka balaka agütsüba bilemteta pa nem tenüingsang agüja ano kum 100 sülenji Ao

kin/Naga nung songjen asoshi kechi inyaker?, ta asübaji kanga tongtibang lir, ta paisa ayongzüker.

AKM tenzüker kum 100 ajungba ya asenok putepa aser lungjemba den tenlatepba tamaitüsü lir. Aji oda, centenary sentong ya Waromung yimdak ayonga akatsüba lir, saka iba sentong takok ngua amungtsü asoshi par yimer kisüing khuret mesüdaktsüi Ao kin ajaki akokba maparen ajak nung nungita yaritepba den külemi anembonga amungtsü yongya atatsü paisa ayongzüker. Paisa AKM centenary nüngtem nung centennial yim yanglutsü lungzüng ka azüingtsü aser iba lungzüngji Rev. Jepdak Aier-i meshitettsü.

Iba sentong nung tayonger tongti MLA & Advisor Transport Technical Education, Temjenmenba; Ao Kaketshir Mungdang Tir, Lanulemba Longchar; JKTM Tir, Imomanen Tzudir; Waromung Village Council Chairman, Aowati Ozüküm; AKM Centenary Local Planning Committee Convenor, L. Imlinungba Lkr; Waromung Shisashir Telungjem Tir, Imchayanger Aier, parnoki shilem balala agi. Sentong nung telok kari kentenmenü balala ajanga tesentepertem ayongzüker. Waromung Baptist Arogo Pastor M. Meren Mollier den temoatsü meshia sarasademer sentong tenzüker aser Alongkima Baptist Arogo Pastor, Longjenjang Ozüküm den tenüingsang agütsür sentong tembang.

## Treasuries & Accounts ajanga HoDs atema workshop ayonger

**Dimapur, Monupii/May 01 (TYO):** Finance Department sentong kübok Directorate of Treasuries & Accounts ajanga Heads of Departments (HoDs) atema workshop ka May 6, 2026 anepdang 9:30 ako nungi tenzüka Capital Convention Centre, Kohima nung ayonga lir.

State sorkari kübok tang amshiba senotsü dak sendakba aser core policies tejangjaba HoDs nem angatetdaksütsü atema iba workshop ya ayongzüker.

Iba dak sendakba nung Department of Treasuries & Accounts ajanga HoDs ajunga den ketdangsürtem iba workshop nung adentsü ayongzüko.

Finance Commissioner, Nagaland, Kesonyu Yhome, IAS-i iba workshop ayongzüker

nükjidong lemsateptsü. Iba sentong nung shisalen sayur ya Amenla Jamir, Director, Treasuries & Accounts; Ketoulhou Metha, OSD Budget, Finance Department; Vechiso Chakhesang, Addl. Director, Treasuries & Accounts; I. Aochuba Pongener, Addl. Director, Treasuries & Accounts; Chibemo Shitirie, Sr. Audit Officer, O/o the Accountant General; Shaji K, Sr. Accounts Officer, O/o the Accountant General aser Aienla Pongen, Former Consultant Contract Management, NHP (World Bank) alitsü. HoDs temi iba workshop nung shilem agitsü atema 8798747800 nung akok tashi tekeraba nung osang agütsütsü mepishir, ta sangdong ka ajanga ashi.



Shimla, May 01, 2026: Linük Tir, Droupadi Murmu-i Himachal Pradesh semdangba mapang state Angh Kavinder Gupta (abelen) aser Chief Minister, Sukhvinder Singh Sukhu (tiyong) nati la agizükdang tangokba noksa nung angur.

### India nung seret 19 indang commercial cylinder jenjang tuogo

**New Delhi, May 01 (Agencies):** Hokolbarnü Centre sorkari seret 19 indang commercial LPG cylinder shia sen 993 tuogo, anungji tangbo Delhi nung seret 19 indang commercial cylinder kaji sen 3,071 asütsü. Tang tashi nungbo domestic LPG cylinders jenjang matu, ajisüaka atutsüa akok ta bilemer. West Asia nung rara ajanga alima tesem ajaklen totzü aser gas jenjang atur.

Indian Oil Corporation-i, petrol, diesel aser domestic LPG (seret 14.2 cylinders) jenjang memelenshir, ta metetdaksüogo. "Linük nung LPG consumers crore 33 dak tema atema domestic LPG (14.2 kg) jenjang matur," ta IOC-i metetdaksü. Centre sorkari commercial LPG jenjang atuba sülen Tamil Nadu Chief Minister M K Stalin-ibo sorkar dang tangsa jenjangji atsüzüksüla, ta

takhangba agütsü. Stalin-i X ajanga, election magidang onoki tetzüa aruba ama election tembangli BJP-i aniba Centre sorkari LPG jenjang atur, ta metetdaksü. Stalin-i, "Alima nung totzü tazü jenjang aluba mapang nung sorkari iba tajangzükji nürburtem nem magütsü. Nürburtem atema mebilemstüi jenjang atutsü atema Centre sorkari West Asia nung rara tatemtsü amshir," ta metetdaksü.

### EAM Jaishankar aser Iran FM nati West Asia tensa atema jembibi

**May 01, 2026 (Agencies):** Bodhbarnü Iran Foreign Minister, Seyed Abbas Araghchi-i phone ajanga India External Affairs Minister (EAM), S Jaishankar den jembio. Lenir anati linük ana tsüngda tesendaktep atema jembiba den külemi West Asia tensa atema o lemtepogo, ta ketdangsertemi metetdaksü. Tesülen Jaishankar-i X ajanga, "Nikongdang Iran Foreign Minister Seyed Abbas Araghchi nungi 'call' ka agizük. Künati iba tensa dak sendakba nung lenla balala atema o

lemtepogo. Künati maneni tongtepratepa alitsü bangjem," ta metetdaksü. New Delhi nung aliba Iranian Embassy-ia, "Foreign Minister Seyed Abbas Araghchi aser EAM Jaishankar nati ceasefire, linük ana tsüngda tesendaktep, regional aser International onüktem nung o lemtepogo," ta metetdaksü. Tang West Asia nung tensa mejungi aliba mapang nung Iran Foreign minister, Araghchi-i Pakistan, Oman aser Russia linüktem

semdangogo. Hombarnü Iranian Foreign Minister-i St. Petersburg nung Russia Tir Vladimir Putin ajuruba den külemi Russia Foreign Minister, Sergei Lavrov-a ajurua liasü. March 21 nü Ato kilonser Narendra Modi-ia Iran Tir Masoud Pezeshkian den West Asia tensa atema o lemtepa liasü. Iba mapang nungji Modi-i region nung tongtibang infrastructures amakba aitsü aser tzüym nung rong sadema senzüdaksütsüji tongtibang, ta shia liasü.



May 01, 2026 nü Jabalpur nung aliba Bargi Dam nung NDRF sepaitemi kümzükba maparen inyakba noksa nung angur. Ajungbena yipru tesashi aitba ajanga iba tesem nung rong meküpa lendong nung nisung 9 süogo.

### Tanü West Bengal nung polling station 15 nung election agishitsü

**New Delhi, Monupii/May 01 (Agencies):** Election Commission-i May 2 nü West Bengal nung polling station 15 nung election agishitsü atema tetuyuba agütsüogo. Constituency ana- Magrahat Paschim aser Diamond Harbour na nung election agishitsü atema ECI-i tetuyuba agütsü. State pezü aser UT ka nung assembly elections agiba sülen vote azüngtsü anogo ana- asem dang lia West Bengal nungbo BJP aser Trinamool Congress na tsüngda aitsütep manener. Bengal nung election shilem tanabuba agiba mapang nung EVM raksaba aser Falta, South 24 Parganas nungbo EVM nung BJP button nembangtsüba tashishiba ken otem lir.

vote magütsüet, ta metetdaksü. Malviya-isa, iba ya 'Diamond Harbour Model' lir, aser iba model ajanga Mamata Banerjee'er adianu chir Abhishek Banerjee-i Lok Sabha menden nguteta liasü, ta ashi. Ano külen tanga osang ka nung TMC lenir Kunal Ghosh-i, "Party nung inyakertem aser party pusemertem nikongdang 3:30 ako tashi EVMs yua aliba strongroom nung liasü. Ajungbena strongroom ji ano nikongdang 4:00 ako nung lapoktsü ta email ajanga osang aru. Onoki party nung inyakertem den tongtepa mapang nungbo parnok senshiadoker liasü, anungji onoki ilonga ao. Tangbo onok telungi meidaksür. BJP bo jaoker," ta metetdaksü.

Hokolbarnü West Bengal Chief Electoral Officer, Manoj Kumar Agarwal-i, South 24 Parganas nung tesem ana- asem nung election agishitsü, ajisüaka Observer-i tashishiba agütsüba report sülen ang jangjatsü, ta metetdaksü. April 29 nü election shilem tanabuba agiba mapang nung West Bengal nung BJP co-in-charge, Amit Malviya-i, EVM nung BJP maitüsübo 'tape' amshia nembangtsür liasü, ibaji ajanga Diamond Harbour constituency kübok Falta nung aliba polling booth aika nung voters-i party candidate nem

vote magütsüet, ta metetdaksü. TMC-i X ajanga, iba ya anüngdang democracy tepsetba lir, ta metetdaksü. TMC-isa, voters amokmerenogo, electoral roll nung tenüing aika agienogo aser Central sepaitem tim mesüi amshio, saka item ajak tamakok anguba ajanga BJP-i EVMs tamper asütsü meranger, ta metetdaksü. West Bengal nung assembly election shilem ana lemsar April 23 aser April 29 anogotem nung agia liasü aser May 4 nü vote azüngtsü.

**OFFICE OF THE CHUCHUYIMPANG SENSO MUNG DANG TENÜNGSANG AGÜTSÜR**

**Kr. Maongsenla, D/o Wb.Wapangtsüba** aser Wt. Akangrenla (Chuchuyimpang), 2026 küm Nagaland University kübok Master of Arts (Geography) tatidang nung "Gold Medalist" ngutetba asoshi Chuchuyimpang senso sanger ajak tenüing nung Chuchuyimpang Senso Mungdang Office ajanga tepela lemsateper aser Tsüngrem tenüing sanga takoker nem Tetushi tulu agütsür. Tarutsü nung ne shisaluyimba lemanng ajak nung Tsüngremi maneni moajangma.

**Sd/- K. IMLI JAMIR** President Chuchuyimpang Senso Mungdang

**Sd/- (CHUBAMAONG)** Secretary Chuchuyimpang Senso Mungdang

**SBI State Bank of India**  
STRESSED ASSETS RECOVERY BRANCH, Jorhat  
Na-Ali, M G Road, Jorhat, Opp. ASEB Building, PIN-785001 (Assam)  
Tel No : 0376-2300193 / 2300204

[Rule - 8(1)]  
**KIOJEN AGIBA NOTICE**

State Bank of India nung Authorised Officer ka ama tsünglanglen sign süa aliri Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules 2002 nung Rule 3 kübok section 13(12) nung agüja aliba tashi amshia 19.12.2025 anogo nung Demand Notice ka agüja sen apur **Shri Robin Sema, Proprietor of M/S Naga Traders aser Shri Azheto Zhimomi, Guarantor of M/S Naga Traders** dang iba notice agütsüba sülen anogo 60 tsüngda notice nung shia aliba sen Rs.3,19,90,816.00 (Rupees Three Crore Nineteen Lacs Ninety Thousand and Eight Hundred Sixteen only) agüjang ta tuyua liasü. Ajisüaka sen apurtemi senji magütsüet, anungji sen apur/Guarantor aser public dang ya sangdonger, tsünglanglen sign süa aliri shia aliba Act nung Section 13(4) kübok pa/la nem agüja aliba tashi amshia 2026 küm April 29 anogo nung tsünglanglen shia aliba kiojen agiadokogo. Talisa sen apur/Guarantor aser public dang iba kiojen dak sendakba nung kecha inyakshangi masütsü metetdaksür, mesüra State Bank of India nem Rs. 3,19,90,816.00/ - aser 20.12.2025 anogo nungi tenzüka interests aser costs agütsütsüsa akümtsü.

**Iba Act nung section 13 kübok sub-section (8) nung ajemdaker sen apurtem dang item kiojenji mapang shidak nung alangzüksü metetdaksür.**

**Kiojen osang tejangja**

- Kalibari Road Opposite Dimapur Municipal Council, Dimapur, Nagaland 797112 nung Shri Robin Sema tenüing nung Patta No. 1442, Dag No. 360/1742, Mouza No. 01, Block No. 06 nung aliba aliba tasazük 00B - 01K - 15 L of area 5040 Sq. ft aser yangji aliba ajak. Boundary: North - Laxmi Das South - Zhimomi Apartment, East - Main Road, West - Railway Mandir.
- Kalibari Road Opposite Dimapur Municipal Council, Dimapur, Nagaland 797112 nung Shri Azheto Zhimomi tenüing nung aliba Patta No. 481, Dag No. 725, Mouza No. 01, Block No. 06 nung aliba tasazük 00B - 01K - 14 L of area 4896 Sq. ft kimong nung aliba ajak aser RCC densema. Boundary: North - Plot of Shri G Gupta, South - Plot of Shri Robin Sema, East - Sitla Mandir, West - Approach Road.

Date: 29.04.2026  
Place: Dimapur  
Authorised Officer  
(State Bank of India, SARB Jorhat Branch)



# TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 02, 2026

## West Bengal nung EC & SC angbangyim

- P Tiamongba Aier

April 29, 2026 nü West Bengal election nung voting tembangba sülen nisung ajaki May 4 nü results nung rangloka lir aser osang metettsü kanga yongyateper, kechiyong Election Commission of India (ECI)-i maparen inyakba nung ashishitep ken o aika adoka lir. West Bengal nung ken o tongtipang kaji vote enoktsür tenüing aika agienba lir aser iba ya Special Intensive Revision exercise mapang electoral rolls nungi tenüing lakh tirtugu shi agiena liasü. Special Intensive Revision mezüngbuba shilem nung draft rolls nungi vote enoktsür lakh 58 shi agiena liasü aser iba mapang voters lakh 60 shi "under adjudication" nung ayu aser lakh 5 shi katitok. SIR mapang "under adjudication" kübok ayurtem rongnungi nisung lakh 27 agien, aser iba ya Muslim nunger teimba ser aliba constituency tem nung teimba agiena liasü. Iba khuret atema Supreme Court-i appellate tribunals 19 tashi amenok saka iba mapa ya kanga menur ang inyak aser election tonga aruadok. Appellate tribunals inyaksangshi nung ashishitep aser teratatep adoka liasü aser voting mezüngbuba round magidang tenüing 139 tashi meyipa enok. Iba sülen voting tanabuba round matongdang tenüing 1,468 meyipa enoka liasü, ajisüaka tribunals ajanga ken o kwi benoka repring'ar osang tejangja mali. India kübok state balala nung SIR maparen inyaka arudang West Bengal nung ashishitep kanga adok aser voters kanga timtemdaktsüogo. Bihar nung election agitsü aliba jakdang SIR maparen inyaka liasü aser iba mapanga kasa tebilemstütem adok. SIR ya senso kuli tendangba mapa ka aser kuliji voter-i agütsütsü aser tangutsü tasak kulikakettem meshi ta nisungtemi aija liasü. Bihar nung SIR inyakdang Supreme Court tiyongtsüi ai aser ECI dang Aadhaar agizüktsü tetuyuba agüja liasü. Bihar nung ECI-i tansütsü ngur asütsü aser iba ajanga tanga state tem nung SIR maparen timtem melii agitsü ta bilema liasü. Saka West Bengal nung ECI-i inyakyim tasentem benokba dang masü saka parnoki micro-observers 8,000 yok aser iba ajanga EROs tashi mali kümdaktsü. Ano ECI-isa special scrutiny atema "under adjudication" list tulu ka bendena liasü aser Supreme Court-i ECI nem tajangzük agütsüba ajanga mapang menutsüsa aküm. ECI-i verifications repringtsü atema judicial officers mapa lemküktsü aser tribunals 19 tentet saka parnoki mapa meilongi dang inyaka liasü. Anungji taküm West Bengal assembly elections nung shiri takok ngudir nguaka Election Commission of India aser Supreme Court inyaksangshi nung tasüngdangbatem alitsü. Election nung ECI ya neutral umpire ka aser Okadak ya sensotem temeten aser nüjiso kümzüka ayudak ama züngshir saka parnoki voter tem tebilemstütem agizüka mapa shitak meinyaktet. May 4, 2026 nü election results adokaka nisungtemi ashishitepba manentsü aser ECI o SC inyaksangshi nung tamang makatsü anungji Centre nung koba sorkar lidir liang, ECI aser SC yabo shinga tsütsü tejak mashiba- neutral body kaka ama ayutsü merangtsüla aser iba asoshi linük sensotemi ola adoktsü kanga nüngdaka kümogo.

## OLEMSABANG

### NLTP ACT 1989 ajanga Naga Khristantem telok ana lemsar otia rarateper

K. LIMA LONGKÜMER

(Yashi adok nungi...)

#### Sayutsüingir 2:3

Yi agi kü mang koda peladaktsütet aser tamachi mapa nung koda teka itet, aji kü kolok agi bushi.

#### YI, NA SHIBA?

1. Ni yi, ni takar aika sensaker kumdakja ali tonga atsüzüker.
2. Ni yi, ni ajanga tetsür aika amitsür kümdaktsür.
3. Ni yi, tobur tajung lanur dak nungi sentsüwangshi remzüka yokbaji ni.
4. Ni yi, ni meimchir dak nungi tekoklok shisatsü auyar aor.
5. Ni yi, alima nung lajar millionsa million akumbaji ni inyak.
6. Ni yi, shisa taka yimsüsürji süngdong teintet nung mesen ai ama ni arüdaktsür.
7. Ni yi, ni ajanga alima nung jabujari, nüktabangta, makmanü jendi adoktsür.
8. Ni yi, ni ajanga alima nung ozüing raksaba aser ochi yimsüsüba samatsür.
9. Ni yi, alu tamen arutsü yongya alidang yipru tulu arua motong ajak laodaktsüba ama teyimlatsü aliba lanur jendi ni tepseter.
10. Ni yi, ni ajanga alima sünga sentsütsür züindaktsür.
11. Ni yi, ni ajanga tamaren yimli tulu laotsü tashi agütsür.
12. Ni yi, ni ajanga alima tashi temeteter aser yimsüsür tenük pokdaktsür.
13. Ni yi, ni ajanga meimchir molungjang nung shiruru molungjang agütsür.
14. Ni yi, ni ajanga meimchir sentsü tobur ajung naro ama remzüka yoker.
15. Ni yi, ni ajanga nübensanger agi kija lir kümdaktsür.
16. Ni yi, ni ajanga lungki tulu jireb ama meimchir nükjidong tazüingla kümdaktsür.
17. Ni yi, ni ajanga lokti ajak nung meinprogtsü aser rongrong adoktsür.
18. Ni yi, ni meimchir nem arishi tatsü akümstü senpet agütsür.
19. Ni yi, ni meimchirtem dak nungi akümket tajung sepzüka endoktsür aser maksü korang semoktsür.
20. Ni yi, meimchiri wara tashidakbo tsübur saka nibo bushir aser kü dak azüiter.
21. Ni yi, ni bushia asemerji molumi lenmang anasaba akümer.
22. Ni yi, molumiji kü akang tembar tajungtiba.
23. Ni yi, war nung asüba dang nungi ni teimba tepseter.
24. Shiba teka agi yi ayoker aser yanglur paji mojing tenyar.
25. Yijemer dak molung alemerji nisungi yangluba noksa dak molung alemba den saku.
26. Yijemeri tashi temeteter sayubentsü mangashir.
27. Noai yi mesep nung par jaboso Ham chir Cannan dak adakatemsang ta ashi.
28. Isaia 5:11 - Shirnoki anepdang yakta saker majemtsü bushia saker aonung yi melettet tashi menua ata-a alir, parnok asoshi ayatai.
29. Yeremia 25:27 - Jemkanga jemang aser saksüang, laoang aser joko teshishi.
30. A. Shin 23:30 - Yi züngdang talangka südoksünemertem, temesepba yi bushitsü aortem. Yi merema alidangji, iba marok nung prangshidang, aji arema aludang nai teranglok. Tatem nung yagi peri ama meteper aser mim peri ama mechir.
31. A. Shin 31:16 - Samatsü renema alir nem yi agüjang aser taküm nung kürema alir nem yi jemdakjang.
32. Daniel 5:2 - Belshazzar chubai yi ajem aser pa yimli lao.
33. Shibai yi meimer pai tasüba meimer. Yi tamajung agi nisung aeka tepsetta meyokogo. Yi tajung achemmer aser Cigarette asakshi acher aeka temesen Cancer agi asür, itemji Kanga takar teimba. Temenen den tembar akümba ajanga tembar tajungsangi anojunge daküm tempangdaktsür. Iba khün ya Naga nunger Yi anemma apusoba khün kümndi

#### KHÜN - YI ANEMMA APUSODI

1. Apusoang Nagaland Yi tongbang den raradi, Tasüitta nokdakdi, Menen tongbang den rarang.... Takok korang angutsü, Khristaji kü jakdang lir.

**Leplazü :** Ayimtenang Nagaland Menen tongbangji kokdi.

2. Nagaland Khrista soshi, Ajaklen ola yokdi, Yi temenen anemma Naga ajak lungjemdi.... Daküm jendi samadar Menen nung jendi samar.
3. Naga tepsetter yi lir Mojing dang nungi taoba, Eden ber Dimapur lir, Sodom aser comora.... ama kenü samatsü Menen tongshi mesotsü.
4. Sakang, sakang Nagaland. Khrista den apusodi Asen den pa denna lir, Takok khünji adentsü.... Takok nisan mesotsü Tashe ajak agütsür.

**Leplazü :** Ayimtenang tejaklen

Tepela Khünji tenang.

5. Takok anaü nung dang lir, Azümesena teli, Takok Khristai agütsür Pa nisan den ayimdi.... Menen tsükchir anemma Naga Walunir odi.

(Repeat chorus followed by fourth stanza)

Composed by - K. Lima Longkümer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Lenmang nung sayutsüngi nokdangba anema Arogoi ken o benok



Life Community Church nungi züngsem kar noksa nung angur.

**May 01, 2026:** England nung ktdangsertemi yimti tiyong nung sayutsüngiba nokdangba anema May 1, 2026 nü Arogo kati temepishiba ken o ka agütsüogo.

Essex nung ktdangsertemi Life Community Church anema agütsüba Community Protection Notice (CPN) tetuyuba anema Arogoi temepishiba agütsübaji Colchester Magistrates' Court-i angadangtsü.

Khristan temeden telok Christian Concern-i, ktdangsertem jagi nija kar mesüra sayutsüngir kar anema masü saka Arogo rangben nem iba tenokdangba agütsü, ta ashi.

Bread of Life Community nung pastor, Rev. Stephen Clayden-i, tesüiba küm 6 tashi Colchester nung Arogoi ozüng kübok sayutsüngia arur, ta metetdaksü.

Paisa, "Onoki shinga meyirutsür. Khristai tenyaba wadang tuluba sendoktsüsa onok amokmeren mesüdaktsütsü," ta

metetdaksü.

Clayden-i, Arogoi ozüng alema meinyak, anungji onoki CPN tetuyuba anema ken o benoktsü, aser Christian Legal Centre-i onok nungita yaritsü, ta metetdaksü.

Paisa, "Onoki ozüng akhümtsübur, ajisüaka Yisu Khrista osangtajung sayutsüngiba onoki manentsü. Arogo ola madokdaksütsüsa council shinga dak-a tashi mali," ta ashi.

Christian Concern-isa, tamalen council wardens-i onoki moapu nung sayutsüngidang sound system amshiba nokdangba liasü, ajisüaka Public Space Protection Order ajanga yimti tiyong nung sound system amshiba menokdang, ta ashi.

November ita nung wardens-i Arogo nem Community Protection Warning agüja liasü aser tesülen senchi achitsü, ta amokmerena liasü.

Parnoki sound system amshibaji dang masü saka sayutsüngiba onük nung keta

alibatem-a ashishia liasü; item rongnung kodak aser molumi indang jembiba densema lir.

Arogo tenüng nung Christian Legal Centre-i court nung ken o jembitsütsü.

Court nung ken o jembiba mapang nung Arogoi court dang Arogo anema benoka aliba CPN ji thinenjang ta mepishitsü.

Christian Legal Centre chief executive, Andrea Williams-i, sayutsüngiba aser lokti dang kulisübaji Khristan tamang nung tiyongtsü lir aser ibaji ozüng agia kümzüker, ta ashi.

Williams-isa, "Khrista osangtajung sangdongba atema Arogo anema ken o benokra ibaji ajanga UK nung yimsü temeden aser pei tebilemba jembitsü temeden jenjang mejungi akümtsü," ta metetdaksü.

Laisa, "Iba Arogoi nüburtem den Yisu Khrista osangtajung lemsateper, anungji onoki ktdangsertem tetuyuba anema Arogo pusemstsü," ta metetdaksü.

# Meghalaya nung Arogoi temesepba mozü anema sorkar den longjemer

**May 01, 2026:** Meghalaya kübok West Garo Hills nung aliba Baptist Arogo kati Tura nung sorkar rehabilitation centre ka amenoktsü atema ali agütsüogo.

Meghalaya nung sorkari temesepba mozü anema inyakba mapang nung Arogoia sorkar nungita yaritsü asüngdang.

Tawa Drug Reduction, Elimination and Action Mission (DREAM)-i Arogoi agütsüba kimongji reprangdangogo. Iba sülen anogo ka lir high-level coordination senden ka ayongzüka amenba mapang nung director Francis Kharshiing-i maneni telemtetba kar agia inyaktsü metetdaksü. Iba senden nungji West Garo hills nung aliba district

ajak nungi Deputy Inspector General of Police (Western Range), Deputy Commissioners, District Social Welfare Officers, partner NGOs aser yimsü dak sendakba reju balala nungi ktdangsertem aden.

Temesepba mozü anema inyakba maparen Arogoi yaritsü melungtetba ya kanga tongtibang, ta Kharshiing-i metetdaksü.

"Iba ama tebilemstsü tulu aketba onük bentettsü atema Arogo aser sorkar dang masü saka lokti tentet ajak teyari nüngdaksü," ta pai ashi.

Ktdangsertemi ashiba agi, Meghalaya nung 2025 küm temesepba mozü achir lakh 2 shi liasü saka tangbo lakh 3 jungnüa kümogo, ta

metetdaksü.

Nütsüng million 3.2 aliba Meghalaya nütsüng shilem 10 bo temesepba mozü achirtem lir. Iba state nung nütsüng shilem 83 bo Khristantem lir, aser tang iba tebilemstsü onük atema Arogoi sorkar den longjembaji aikati pelaa agizüker.

DREAM-i district shia nung mozü chirtem atema detox centre kaka aser rehabilitation centre kaka amenoktsü. Tangbo sorkari lapokba detox centre ana dang lir.

"Arogo aser lokti tentetem den longjemer inyakba ajanga DREAM-i Meghalaya ya temesepba mozü mamshiba state ka kümdaktsütsü atema maneni inyaktsü," ta Kharshiing-isa metetdaksü.

# ANOGO ABEN TSÜNGREM DEN

## Tanelaji teremsep

### 1 Tesa. 5:19

Alima nung Tsüngrem mapa matalokdaksütsü asenoki nokdaksü makok saka asenoki Pa tanela asenok taküm nung remseptsü akok. Asen taküm nung Tanela Temeshi mapa inyaksü Tsüngremi asenok nem nüji agütsü. Kodang tanelai ashiba tashi mangalir, mesükshi-i yutsüdir, mesüra sentokdir asenoki asen taküm nung pa remsemdaktsür. Isaia ainkari iba nungi adokba rasaa ashir: "Aser Pai ashi, oang aser iba nübur dang shiang, atangji nenoki angashir saka mangatetter, nenoki atangji angur saka memeteter" (Isaia 6:9; Mathi 13:14-15).

Kodang nai temenen menadir, Tanela Temeshi-i nü dang temulung meyiptsü ashir. Nai ashi mangai toktsüra aser temulung memeyipra Tsüngrem O nung ne mulung meranga akümtsü. Tsüngremi ne taküm asoshi mulunga aliba jembira aser nai aji songtemra, ne taküm nung Tanelai-i mejembitsü mapang ka arutsü. Tanelai jembiba nai maneni sentokra Tsüngrem nungi joko nai kecha O mangashitsü. Nai maneni Tsüngrem O nung tekong merangra, Pai ne nem O tasen kecha magütsütsü. Ne taküm nung Tanela Temeshi ola menokdangtsü kümdangang. Pa tanelai-i ashiba ajak nungbo na sünepba malitsü saka Pa O-i na talubusa taküm dangi anitsü.

# Arunachal nung Khristan teloktemi APFRA 1978 anema longkak ait



April 30, 2026 nü Changlang district nung Khristantemi longkak aйдang tangokba noksa nung angur.

**May 01, 2026:** April 30, 2026 nü Arunachal Pradesh nung Changlang district nung Arunachal Christian Forum kübok Changlang District Christian Forum (CDCF)-i ayongzüka Arunachal Pradesh Freedom of Religious Act (APFRA), 1978 agienang, ta takhangba agüja longkak aitogo.

Mener longkak aitba sentong nungji Christian organisations, Arogo tentetem aser sensotem aikati shilem agia liasü.

Parnoki ozülu balala anema APFRA 1978 ya agientsüla, kechiyong iba ya meimchir temeden anema lir aser yimsü temeden atema amokmeren lir, ta metetdaksü.

Brihostibarnü iba sentong ya anepdang 10:00 ako meta

tenzüker aser nikongdang 2:00 ako nung tembanga liasü.

Longkak aitba sentong nung Khristantemi sarasadem, osangtajung kentem aten, Arogo nung lenirtem aser organisations balala nungi lenirtemi o jembia liasü.

Longkak aitba sentong nung o jembirtemi nüburtem longjema alitsü aser linük temzüng kübok temeden balala kümzüksü atema tayongzüka agütsü.

Parnokisa sorkar dang iba ozüng agientsü atema telemtetba agia inyaktsü takhangba agütsü.

Yimsü balala amangertem tsüngda tesünep nung alitsü aser sensotem temeden wazüka ayutsü nükjidong nung iba sentong ayongzüker, ta lenirtemi metetdaksü.

**AO OSHI ANGAZÜKDAK: TANÜ ANGAZÜKTSÜBA OJANG**



**Yangi**

(adv) idaki,ileni (here,this way)  
\* Yangi alirtem ajak süngo ajemtsü.

**Yangji**

(adv) idakji, iba nungji ( there)  
\* Yangji asenok ajak külemi alitsü.

**OLONG PAITEP # 7491**

Grid for crossword puzzle #7491 with numbers 1-17 indicating starting positions.

**TIPLÉN**

- 1. Shi lepsar sempet agütsüba - 6
5. Anü yir sülen - 6
6. Arem shiruru tesashi ka - 4
7. Nüktzü alu - 4
10. Aibelenba atema o ashi - 5
11. Tesem melenshi - 5
12. Sentong - 4
15. Mi apudak - 4
16. Kou mali - 6
17. Tai mekümtsü - 6

**LANGTSÜNGLEN**

- 2. Yangertet - 8
3. Kecha mali - 4
4. Talang nung masü - 3
6. Tekolak sobutsü - 6
8. Yimdangi aru - 8
9. Adenshi - 6
13. Khu abenba lisü - 4
14. A \_ \_ \_ sor - 3

**OLONG PAITEP # 7490 TELANGZÜBA**

**TIPLÉN :**

- 1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

**LANGTSÜNGLEN :**

- 1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

**NAI-A YA METETTER MA**



German YouTuber Tom Kopke ajanga Guinness World Record ka yangluteta lir aser iba ya pai tayimtsü nungi pungzüka lur anüng tom nung Rubik's cube inyaktetba indang lir. Arishi küm 23 tain Tom Kopke dang YouTube nung Tooleko ta ajar aser pai Mossel Bay, South Africa madak tayimtsü nungi pungzüker parachute melapokdang 23.333 seconds nung Rubik's cube inyakteta liasü.

**Dr Sonowal-i BRICS Global Forum president inyaktsü**



Guwahati, May 1, 2026 (Agencies): Assam nunger Dr Bhaskar Jyoti Sonowal-i BRICS Entrepreneurs Alliance (BEA) Global Forum nung President inyaktsü shimteto.

Dr Sonowal-i 2026-27 kümsük atema President inyaktsü aser iba ya BRICS+ economic framework sasep nung India shilem tulu akümba tamaitüsü ka lir.

Dr Sonowal-i tang BEA India atema CEO aser Executive Director ama inyaker. November 2026 nung India nung BEA Global Summit amungtsü atema inyakba mapang pai BEA Global Forum President inyaktsü.

Iba menden asoshi Dr Sonowal shimba ajanga cross-border trade ajungkettsü,

international partnerships akangshitsü aser Indian entrepreneurs asoshi talisa MSME sector nung maongka tasentem angutsü imlar.

"Indian enterprises ajanga alima nung temelenshi bener arutsüsa renema aliba mapang ka iba mapa inyaktsü shimba ya tetushi lir" ta Dr Sonowal-i ashi.

Pai maongka tasentem adoktsü aser BRICS+ linüktem tsüngda tesentaktep akangshiteptsü asoshi inyaktsü ta ashi.

"Ajak adenba global trade framework ka nung India-i shilem agir aser Dr Sonowal lenisüba ajanga iba mangdang len anir aotsü" ta BEA Global Secretary General Boris Tarasov-ia ashi.

"Pa shimba ajanga Indian entrepreneurs asoshi sabang tajung ka amentettsü aser iba ajanga global markets den lenmang lapoktsü aser rongsenketzüng renlokba nung shilem agitsü" ta BEA India nung Founder Vice President Thomas Lotha-ia ashi.

Iba mapa ajanga India-Russia trade tesentaktep akangshitsü aser maongka tasentem lapoktsü ta BEA Russia President Evgeny Skomorovsky-i ashi.

Külen, BEA Brazil President Fernando Soares-ia India lenisüba pusema nungitba metetdaksü.

April 18 aser 19 anogotem Hyderabad nung India BRICS Business Summit aliba sülen anogo ishika lir Dr Sonowal shimba osang metetdaksüogo.

**Gauhati University nung Tai-Ahom language course tenzüker**

Guwahati, May 1, 2026 (Agencies): Gauhati University-i National Education Policy (NEP) 2020 nükjidongtem den liromedemtsü atema Tai-Ahom language aser medieval manuscriptology indang six-month certificate course tenzükogo.

Iba ya Centre for South East Asian Studies kübok lir aser academic engagement ajanga Tai-Ahom oshi ajungkettsü atema lir. Iba ajanga Tai-Ahom oshi research, documentation, aser preservation sütettsü.

"Tai-Ahom oshi aser Assam putiotsü maitsü kanga sendaktepa lir" ta historian aser taoba Gauhati University professor, Padma Shri Jogendra Nath Phukan-i ashi.

Tai-Ahom oshi wazüka ayuba aser bushiba ya academic exercise ka dang masü saka asenok külemi shia meteta tejakleni aoba senmang kümzüka ayuba mapa ka lir ta pai ashi.

"Nüboritem indang maitsüji oshi lir. Oshi ya nübor tanüla lir aser oshi asentenshiba ajanga sobaliba akhümtsübuba sayur.

Indigenous Knowledge System (IKS) ajanga asenoki scientific research aser creative thinking ajanga sobaliba shisatsü tali takaba kümdaktsütsüla" ta Vice Chancellor Nani Gopal Mahanta-i ashi.

Iba sentong nung Registrar Utpal Sharma, Academic Registrar Rajib Handique, Dhruva Pratim Sharma, academician Dayananda Borgohain, Biju Moran, Nityananda Gogoi nunger den faculty züngsemtem, researchers aser kaketshirtem aden.

**Centre-i Kuki-Zo telungpurtem den jembishinü tenzükogo**

Imphal, May 1, 2026 (Agencies): Centre-i April 30, 2026 nungi Suspension of Operations (SoO) agreement kübok adenba Kuki-Zo telungpur teloktem den jembishinü tenzükogo.

Ita ana shi olemtep melii dang aruba sülen Manipur nung security tensa süngjemdaksütsü atema maparen tenzüker.

Iba senden ya Ministry of Home Affairs-i New Delhi nung ayonga amen. Senden nung mendenji

Northeast peace talks atema interlocutor aser taoba senior Intelligence Bureau officer A.K. Ajit Lal menden liasü.

Senden nung Intelligence Bureau, security agencies aser Manipur administration nungi tongti ketdangsurtem aden. Külen, SoO tenangzüktep nung

sign asürtem Kuki National Organisation (KNO) aser United People's Front (UPF) nungi teshimtet nübotem aden.

Anogo piyong senden ya shilem ana lemsar agi aser mezüngbuba session nung security & operational matters indang jembü. Iba nung SoO züngsemtem indang designated camps asoshi jembitep aser telok anaprongi camps kar belentsü mulungtepa liasü.

Kuki-Zo teloktem nungi teshimtet nübotemi Ukhrul district nung mepetmesü aliba indang khuret lemsatöp.

Tanabuba session nung political demands indang jembü aser Kuki-Zo teloktemi hill areas nung Union Territory with legislature takhangba nenshia liasü.

May 2023 nungi ozüng alema


inyaksangshir aser iba atema shingaia tebilemstü khuret magir aser tanü kin o kin tsüngda temulung melemtepi akümba ajanga 2023 matongdang tesentaktep aliba ama meyangluteter ta Kuki-Zo nungeri ashi.

Parnoki benokba onüktem bangdakpur dangi abentsü ta Interlocutor A.K. Ajit Lal-i senden nung nangzüker.

Centre sorkari yimjung bener arutsü, nüngdaktang Central forces mapa lemsütsütsü, camp rationalization aser constitutional framework sasep nung olemtep maneni alitsü asoshi temulung agütsür ta Ajit Lal-isa metetdaksü.

Manipur nung tensa süngjemdaksütsü aser yimjung maparen asentenshitsü atema iba olemtep tenzükogo.

## Iran Tir-i Foreign Minister Araghchi mapa nungi anentsüner



Foreign Minister Abbas Araghchi

**Tehran, Monupii/May 01 (Agencies):** United States den yimjung ken o jembishinüba nung terenlok makai anendaka aliba mapang Iran lenirtem tsüngta mangatettep tuluba akumba osang ka temai adoker, kong Tir Masoud Pezeshkian aser Parliament Speaker Mohammad Bagher Ghalibaf nati Foreign Minister Abbas Araghchi mapa nungi anentsütsü meranger ta ashir.

Iran International osang ka ajanga ashiba agi, Washington den jembishinü akaba mapang Araghchi-i tir aleyia Islamic Revolutionary Guard Corps (IRGC) totuyuba sülen ang anidak ta Pezeshkian aser Ghalibaf nati aitsür.

Araghchi ya cabinet minister ka ama sorkar sentongtem mapa kuma inyaksü melen IRGC commander Ahmad Vahidi teyarir ka ama mapa ang inyaker ta osang ajanga ashir.

Taoba hopta ana nuclear ken o jembiba indang osang Araghchi-i Pezeshkian nem memetetdaksü, ta UK nung aliba osangkaket ajanga ashir. Iba tensa nung tezü tanger Iran tiri pa den yariteper tem dang iba ama maneni inyakra foreign minister mapa nungi anentsütsü ta ashir.

Iba dak sendakba nung Iran nungi sangdong kecha agüja mali.

Israel den tashi mait ceasefire aliba ya teti asoshi ka kumdaksütsü atema Tehran aser Washington tsüngta jembishinüba nung tangatettep kati maruteti aliba mapang Iran linük telongzük nung mangatettep ya adoker. Yimjung ken o jembiba nung terenlok maliba ya lenirtem tsüngta telemsa adoka aliba ajanga lir ta osang temi ashir.

Taoba mapanga Iran yimsüsüba telongzük nung

telemsa adoka aliba indang osang prokshia liasü. Rara ketdangsuba, rongsenketzüng jenjang mejungi akumba aser Iran nung tiamajungbai aiba mechi Pezeshkian aser IRGC den sendaktepa aliba lenirtem tsüngta mangatettep adoka lir, ta Iran International yagi March ita sangdonga liasü.

Islamabad jembishinü nung shilem agiba Iran lenirtem dak telemetba agitsü tashi maliba atema American ketdangsurtem tezü atanger, ta Israel Hayom ajanga ashir. Osang ajanga ashiba agi, Washington-i jembishinün tenzükshitsü atema conditions ana agüja lir, aser yangji kaji tezüngzüktep renemtsü asoshi Iran nungi jembishinür tem IRGC-i bhukumtsüla.

Pakistan nung American proposals nung indang-indanga telangzüba agütsüba nungi Revolutionary Guards ketdangsur Ahmad Vahidi aser Ali Abdollahi nati Iranian political delegation nokdang, ta osang ajanga ashir.

Pezeshkian-i Ghalibaf dang tetsüngtai aita Iran rongsenketzüng chirepba nungi kumzüksü ajungshi ta osang ajanga ashir.

Item osang ya ajanga Iran telongzük nung tashi agi raktepba indang tali tejangjaba akumba ajiteter.

## Australia nung tetsür ka tepsetba mechi rongrongtulu adok

**Northern Territory, Monupii/May 01 (Agencies):** Australia tezülen jila ka nung arishi küm pongu tanur Indigenous tsür ka tepsetba atema temulung melemi alir nisung ka police-i apuba sülen longkak aiter noklang aika adenshia emergency workers den raratepa liasü.

Police-i ashiba agi, nisung 400 shi Northern Territory nung aliba Alice Springs Hospital nung adenshi, kong temulung melemi alisang ya yangji alirtemi süchia oa azükba sülen Hokulbarnü anir oa liasü.

Australia indang public broadcaster ABC ajanga noksa tem lemsatepba nung nisung telok kati temerenshi agütsütsü ayimtena liasü. Parnoki projectiles mereploktsü aser mi senlokja police officers aser medical workers aika yirua liasü.

Iba rongnung nung police gari, ambulance aser fire trucks aika raksatsü. Police temi longkak aiter senshidaksütsü atema tear gas amshi.

Kinungeri Kumanjayi Little Baby ta ajaba tanutsüla pua bener oa tepset ta police temi amanga alisang arishi küm 47 tain Jefferson Lewis ya Alice Springs nung aliba town camps kati pasasa police bushia aruba sülen rongrong ya adok, ta Northern Territory Police Commissioner Martin Dole-i ashir.

"Pasasa bushia aruba ajanga, iba town camp indang züngsem temi Jefferson nem temerenshi

agütsütsü telemetba agi," ta pai ashir.

Tetsür la ya Alice Springs nung lar kidang nungi Honibar aonung nungi samar bushia liasü. La tasü mang ya Brehostibarnü nisung noklang aikati jila temeket nung bushiba mapang ngutet.

Lewis, shiba hopta tetenzüklen 'suspect' ka lir ta jangjatet, pa ya taoba mapanga nisung dak züka merenshiba otsü lir aser tawa ang tepuokdak nungi chioka liasü.

Lewis ya takum kumzüka ayutsü mechi Hokulbarne territory yimtiba Darwin-i bener ogo, ta Dole-i ashir.

Australia Ato Kilonser Anthony Albanese-ia nürburtem jashiba angateter saka nürburtem lungjema alitsü nungdaker ta ashir.

Aboriginal nisungtem rongnung tantsü-tambo aser lar kibong asoshi odongtar Robin Granites-ia nürburtem dang atsüanem akatsü ayongzüka liasü.

"Nisungba puogo, nürburtem dang pelar, aser tang asenoki ochi obendang agütsüdaksütsüla aser Kumanjayi Little Baby mangyimba nung shilem agia asen kibong yaritsüla," ta pai sangdong ka nung ashir.

Tensa tamajungba mekumdaksütsü mechi yi ayokba nung anogo ka tenokdangba alitsü aser Darwin nungi police tali arutsü, ta Northern Territory Chief Minister Lia Finocchiaro-i ashir.

## Taoba Myanmar lenir Suu Kyi house arrest nung ayur

**Nay Pyi Taw, Monupii/May 01 (Agencies):** Tepuokdak yua aliba taoba Myanmar lenir Aung San Suu Kyi house arrest-i yokogo, ta linük nung state media sangdong ka ajanga ashir.

Arishi küm 80 tain Nobel Peace Prize angur Suu Kyi ya mitkar temi tashiyim amshia 2021 küm sorkar atsüngdokba sülen tepuokdak yua liasü aser la ya linük yimtiba Nay Pyi Taw nung military prison ka nung yua liasü südi ta ashir.

Mitkar lenir Min Aung Hlaing-i sangdong nung ashiba agi, la tanüngba mapang ya 'designated residence' nung ayutsü pai tatok agütsü.

Myanmar nung 2015 küm yimsü süa alirtemi democratic tsütsü temelenshi benokba sülen Aung San Suu Kyi ya yimsüsüba mendeni aru, shiba küm aika mitkar yimsüsüba nung democracy bhukuma nokdaker ka ama lia aru aser taoba mapanga la house arrest nung küm 15 dak tema yua liasü.

State media ajanga la indang noksa ka sayuba nung la sepai ana den mena liasü.

Lar jabaso Kim Aris-ibo iba sangdong nung temulung malemer aser la takum aliba indang kuli mali ta ashir. Noksa ya tetetzü maka, kechiaser iba noksa ya 2022 küm agiba lir, ta



pai ashir.

"Ya shidak asütsü ta ni imlar. La tepuokdak tesem melenshiba sayua kuli tejangja kecha ni mangu," ta pai BBC dang ashir. "Ni la den mejembidaksü tashi mesüra nisung kar nem la tia aser kong aliar mejangjadaksü tashi ni kecha nunga mamangtsü."

Iba sangdong ya magütsü tashi la temang anema aliba mesüra la takum jenjang indang kecha memeteti liasü, aser December ita Kim Aris-i küm aika la nungi osang kecha mangashi ta shia liasü.

Lar legal team-ia la house arrest indang osang indang-indanga aruba mali ta ashir.

Küm pongu shi jakdang armed forces temi lar elected government atsüngdokba anogo



Aung San Suu Kyi apuba sülen la nungi kecha mangu aser mangashi.

Lar okatsür temi la küm asem dak tema mangu, lar kinunger temi la den küm ana dak tema osang magiteptet.

Brehostibarnü la noksa mangudang tesüsa la May 2021 nung okadaki arudang anguba tatem liasü.

Iba sülen la tepuodak küm 33 ayutsü obendang agüja aliba aiben ajemtsüogo.

La ajungbena state media nung adokba ajanga mitkar lenirtemi la tarutsü tia melenshütsü renemer südi ta ajiteter.

Coup lenir Min Aung Hlaing ya linük balalai par yimli senzüka yutsüba tatem kati arutsü yongyar aser telungpur

opposition telok tem anema

tongpang aika nung takok anguba sülen temulung tuluba akumer ama ajiteter. Mitkar tanishir temi küm tetenzüklen election agia democratic yimya nung sorkar kumteter ama sayu, saka iba election nunga kasa mitkar lenirtem yimsüsüba menden nung amen.

Myanmar mitkari alima dang parnok ya sorkar shidakba ta sayutsü meranger aser Aung San Suu Kyi house arrest-i belenba ya yangji shilem ka lir, ta taoba mapang Aung San Suu Kyi indang economic adviser inyaka alisang Sean Turnell-i ashir.

Item osang ya shidak asütsü imlar saka temulung melemettsü aika lir, ta Turnell-

i ashir.

2021 military coup sülen Australian economist Turnell ya Myanmar nung democratic yimya nung shimba lenirtem den külemi küm ka dak tema tepuokdak yua liasü.

Iba mapang pa Aung San Suu Kyi ayuba kasa tepuokdak yua liasü aser Turnell-i iba tesem ya kangasa majung ta ashir.

Suu Kyi tamale tepuokdak ayuba mapang lai azüdokshi yimya mamshiba ajanga Myanmar aser alima tesem balala nungi la sapur aika akum aser lar kidang nungisa o jembia liasü. Lai 1991 küm Nobel Peace Prize angu.

Ajisüaka Myanmar mitkari Muslim Rohingyas samatsütsü merang ta International Court of Justice nung tai tonglokja aliba nung mitkar bhukuma nokdaksü 2017 küm telemetba agiba ajanga la kanga mejungi tenüng menük.

La küm aika nürburtem tenük agi mongui tepuokdak yuaka Burmese nürburtemi la kanga akhum agüja züngshir, ta Turnell-i ashir.

"La dak yimya tajung aser Burmese nürburtem den tesendaktep aliba ya tanüla nung amai lir. Aser aji mesama lir ta ni amanger. Linük nung nürburtemi la tepuokdak nungi chioktsü imlar," ta paisa ashir.

# FIFA World Cup 2026 tickets jenjang onsara tali meshir

**Manchester, Monupii/May 01 (Agencies):** FIFA World Cup 2026 group games timba indang tickets tem 'general sale' nung lir, koba June 11 nü tenzüksü lir.

Ajisüaka jenjang onsara meshir. Los Angeles nung United States-i mezüing game Paraguay den asayaba reprangtsü atema ticket ka nung sen \$4,105 tashi agi ayoker.

Tickets tem tang tashi FIFA indang official website nung "last-minute sales" section ajanga ayoker, koba phases balala lemsar September ita nungi yoka arur.

Tang tickets jenjang talangtiba ya sen \$380 lir, koba World Cup nung tang mezüing asayatsü aliba Curacao vs Ivory Coast tsüingta Philadelphia nung asayatsüba densema games balala tenet

atema iba jenjang nung ayoker. Tickets jenjang ya category dak keta lir, kong Front Category 1 ya ajak dang tasakba aser Category 4 ya talangtiba.

Lionel Messi'er Argentina atema tickets ya \$2,475-\$2,925 tsüingta meshir. Brazil asoshi \$2,280-\$2,310 meshir.

Ano iba asayamung tonga arudang 'expensive categories' tali bendenlokba ajanga fans tem tali jashir. Tang tashi 'general sale' nung aliba tickets aika 'expensive categories' nungi timba lir.

Austria vs Jordan, New Zealand vs Egypt, Jordan vs Algeria, Cape Verde vs Saudi Arabia, Algeria vs Austria, Congo DR vs Uzbekistan aser Curacao vs Ivory Coast asaya reprangtsü atema tang ticket ka nung sen \$380 (India nung sen

36,000 shi) agi alitsü akoker. Ano asaya aika atema ticket jenjang sen \$400-\$455 lir.

Argentina vs Austria (\$2,925), Ecuador vs Germany (\$2,550), Uruguay vs Spain (\$2,520) aser England vs Croatia (\$2,505) ya tasaktiba rongnung dena lir.

Group-stage games 17 indang tickets yokmaogo ta FIFA indang website ajanga ashir, aser yangji June 11 nü Mexico aser South Africa tsüingta Mexico City nung asayamung tenzüka asayatsü aliba densema lir.

Iba asayamung final atema heneral sale nung ticket ayokba mali, saka Atlanta semifinal atema Front Category 1 ticket ka nung sen \$9,660 meshir aser Dallas semifinal nung kasa ticket ya sen \$11,130 meshir.

# Thomas Cup: India-i 3-0 agi Chinese Taipei tsükdaktsü

**Horsens, Monupii/May 01 (Agencies):** India nungur tebur badminton asayar mongin Ayush Shetty-i ano pa sempet sayua All England champion Lin Chun-Yi madak 21-16, 21-17 agi takok ngua India nungur Thomas Cup semifinals tongogo aser Lakshya Sen aser tebur tasep asayar Satwik-Chirag natia takok ngua liasü.

India ya semifinals nung Japan mesüra France den asayatsü, shirnoki Chinese Taipei madak 3-0 agi akok.

Chou Tien-chen den asayaba mapang timba Lakshya tesülen sür liasü, saka pai kanga meranga asayateta ghonda ka ser minute 28 asayaba nung 18-21, 22-20, 21-17 agi akok.

Tarep asayar World No. 4 aser Asian Games champions

Satwiksairaj Rankireddy aser Chirag Shetty nati ghonda ka ser minute 15 asayaba nung Chiu Hsiang Chieh aser Wang Chi-Lin madak 23-21, 19-21, 21-12 agi kokteta India jenjang tajungba akum.

Iba sülen arishi küm 20 tain Ayush, shiba Badminton Asia Championships nung runner-up liasü, pai kija asaya tanabuba nung Lin Chun-yi madak 21-16, 21-17 agi takok angu.

Chinese Taipei madak takok anguba ajanga India ya Thomas Cup Finals nung medal ka angutsü jangjar, koba World Men's Team Championships ama züingshir.

India-i Thomas Cup ya 2022 nung akok aser 1952, 1955 aser 1979 nung bronze medals ngua liasü.

## STATE OSANG :

Tapak 1 nungi...

### Ao lima election mapang nisung tesettepba...

Tanü Nagaland ya opposition maliba sarkar yanglur aor, iba ya kechiba ta süra Naga yimden tebilemsü ya teti asoshi telatetba ka dangi arutsü nükjidong yur inyakba maparen ka lir, ta pai ashi. "Tanü joko elected member onok 60 prongbo lungjemogo, joko kin lokti tentet den ano telungpur telok ajak lungjemtsüba dang anünga lir", ta pai ashi.

"Tanü telungpur telok 33 lir, India sarkaria telungpur ajak nem solution koda agütsütsü? Anungji, asenok ajak ka küma lungjemer Naga political solution atema ola adokdi", ta ayongzüik.

Tetushi tesemdanger Advisor to the Nagaland CM, Abu Metha-ia mapang tatsüka agidang, Naga nungur atema lenla balala nung Ao kini shilem tulu agia lir, ano maneni

lanu putu nunga Nagaland renlokba nung Aori shilem agitsü imlar, ta ashi. Paisa linük tenzüker Imkongmeren, saisabonger Dr. Talimeren Ao, mezüing Nagaland CM P. Shilu Ao aser taoba Nagaland CM & governor, Dr. S.C Jamir parnok tenüing tetshia aküm tetushi agütsü.

State sarkari "Nagaland ya benjong lima" ta sangdonga maparen balala inyakba ya tongtibangsa asenok indang takar sobaliba aser bentshia aruba yimsüyimbongtem wazüka aser kümzüka ayutsü atema lir, ta pai ashi. Naga nungur lanurtem dak sempet jenti lir, timtem aser tetsükdaktsü jenti liaka aikadi temaba jenjang tongteta aoba angur, ta paisa shisem. Asen lima tejakleni aotsü asoshi tang Naga nungur asoshi rongdak nüngdakbaji "yimjung aser

telungjem" lir, anungji, iba asoshi inyaktü paisa ayongzüik.

Aor yim shia nung Moatsü benjongji amunger, saka Chuchuyimlang nung Moatsü yimya balaka nung amungbaji talisa Ancha sobaliba bentshia arur Tuensang, Mon aser Longleng district kübok kishikina yimtsüing jaoka mungtepba ya lir. Chuchuyimlang nungera Ancha yimtsüingtem jagi benjong amungi aor aser parnoka tanü amai ozü yimdaki arua külemi longsoteper aser iba ajanga onok tsüingta tesentaktep aser temeim tali adokdaktsür, ta MLA Nuklutoshi-i metetdaktsü.

Chuchuyimlang Village Council Chairman, Ao Sanen Pongen-i tarur ajak pela-a agizükaser PA to DC Mokokchung, Imolangba-i Moatsü salem o lemsatep.

### Waromung yimtak Moatsü among

Sentong nungsa Alakteta jaoker Hon'ble Advisor Agriculture Wb.Mathung Yanthan-i jembidang tsüraburtemi sobaliba tajung wazüka yutsüba ajanga tanü asenok Naga nungur iba sobaliba dak ajemdaker taso shia alir, kechiaser parnoki meranga inyakba, azüoka alitsüba, kati ka den jungtepa alitsüba aser akhümtsütepa alitsüba sobaliba yutsü, anungji asenoki tanü putu itemji bentshia ajanga asenok nüchi ama alir, aji asünung asenoki item sobaliba t a j u n g t e m j i mesamadaktsüsüla ta ashi.

Advisor Wb.Mathung Yanthan-isa Naga lima-i tamangba yimsü arur kelen

sobaliba aika mebenshitsüsa akum, saka asenoki sobaliba tajungtemjibo bentshits la aser wazüka ayutsüla ta ashi. Paisa asenoki tanü Moatsü amonger aser ano ita ishika lir Tsüingremmong amongtsü item benjong ana ya Tsüingrem dang temoatsü meshiba aser Tsüingrem nem tenüingsang agütsüba sobaliba benjong lir, item benjong amongba ajanga asenok sobaliba tajung akabaji shisanger, anungji item sobaliba tajung ya mesamadaktsüi bentshitsüla aser wazüka ayutsüla ta ayongzüka jembi.

Iba sentong ya Sb.Sentilong Longchar aser Kr.Sashikümla Longkumer ketdangsuba nung agi. Tsüingremer lenisüba janzüka Waromung Compound

Arogo Pastor Rev. Senti Jamir-i sarasadema sentong tenzüka den Waromung Village Council Vice Chairman Prof.L.Tongpang Longkumer-i tarur pela agizüka jembi, Jangpetkong Senso Mungdang Tir Wb.C.Imo Walling-I Moatsü salem lemsatapa jembi aser Hon'ble Advisor Transport & Technical Education Wb.Temjenmenba ajanga Yimpoksür O jembi iba den ano telok tentet balala nung sobaliba kenten aser yar tsangsang balala nung shilem agia liasü aser Waromung Baptist Church Home Missionary Wb.N.Meren Aier -i tenüingsang agüja sarasadema sentong tembanga liasü.

# Taoba England defender Young asaya nungi anisüingzüker



**Monupii/May 01 (Agencies):** Taoba mapang England team nungi defender Ashley Young arishi küm 40buba nung asaya nungi anisüingzüker.

Young ya mezüing Watford nungi asaya-a tenzüker aser iba sülen Aston Villa, Manchester United, Inter Milan aser Everton nungi asayaogo. Pa mezüingbo winger ama asaya liasü saka tatsüka lir full-back aküm.

Pa Ipswich Town nungi asaya aliba mapang asaya nungi anisüingzüker. Pa Everton puri chiokba sülen iba club nung 2025 küm July ita küm ka atema dena liasü.

Young ya England team nungi mezüingbuba 2007 küm asaya aser national team nungi 39 ben asayaogo. Iba mapang pai goal tenet idaktsü.

"Jangradema asayaogo, koba kü lanuwa pungmang ka dang liasü," ta Young-i social media nung zülutsü.

"Saka iba pungmang ya-a tatembang kabo alitsüla aser ni kü indang professional career nung Honibar aonung

tatembangbuba asayatsü," ta pai ashi.

Ipswich pur Championship season nung tatembangbuba asaya ya Honibar nü Queens Park Rangers den asayatsü.

Parnok tasembuba jenjang nung aliba Millwall dang nungi point ka agi timba lir aser Middlesbrough dang nungi point ana agi tajungba lir, shirnok pezübuba nung lir. Team ana rongnung kati danga parnok ajatetra play-offs asayatsüsa akümtsü.

Young indang professional career ya 2003 küm Watford nungi tenzüker aser pai Manchester United nungi asayaba mapang Premier League, Europa League, FA Cup aser League Cup kokogo aser Inter Milan nungi asayaba mapanga Serie A kokogo.

Pa yiruba ajanga tang asaya aliba season nung junga masayateti arudar aser pa 13 ben dang asayar lir.

Pa iba club nungi tatema January 20 nü Bristol City goal 2-0 agi akokba asaya nung asaya liasü.

"Iba telemtetba ya künübosa agitsüla ta ni meteter liasü. Ni tambur akümer aser temang agi mekoki akümer. Ni mulungba mapang nung asaya nungi anisüingzüketba atema kanga pelar," ta pai ashi.

"Ni asaya nungi anisüingzüka sangdongogo, saka kü nükjidongji iba club Premier League-i promote sädaktsüsü atema lir," ta Young-i ashi.

## BILEMDANGANG

"Amang nung alidang tesangwa ka lir ta kodanga tamadok."